

SPORAZUM O SARADNJI
Vlade Federacije Bosne i Hercegovine i
Saveza općina i gradova Federacije Bosne i Hercegovine

Zaključen u Neumu, 06.10.2011. godine između:

1. Vlade Federacije Bosne i Hercegovine, ul. Alipašina broj 41, Sarajevo, koju zastupa Nermin Nikšić, premijer

i

2. Saveza općina i gradova Federacije Bosne i Hercegovine, ul. Musala broj 5/I, Sarajevo, koji zastupa Vlado Alilović, predsjednik Predsjedništva Skupštine

U daljnjem tekstu: "Potpisnici",

- **Polazeći** od činjenice da je lokalna samouprava jedna od fundamentalnih vrijednosti ustavnog poretka u Federaciji Bosne i Hercegovine;
- **Uzimajući** u obzir opredjeljenje za unapređenje lokalne samouprave u Federaciji Bosne i Hercegovine u skladu sa principima koji polaze od Evropske povelje o lokalnoj samoupravi;
- **Polazeći** od Memoranduma razumijevanja o obavezivanju ministara odgovornih za lokalnu samoupravu u Jugoistočnoj Evropi, kojim je Federalno ministarstvo pravde potvrdilo spremnost da saraduje sa Savezom općina i gradova Federacije Bosne i Hercegovine na kreiranju akcionog plana za implementaciju Evropske povelje o lokalnoj samoupravi;
- **Uzimajući** u obzir potrebu za kontinuiranim procesom decentralizacije funkcija i u skladu s tim stvaranje sistema finansiranja, koji će garantovati široki suverenitet i značajniju ulogu lokalne samouprave i
- **Poštujući** činjenicu da Savez općina i gradova Federacije Bosne i Hercegovine, shodno članu 51. Zakona o principima lokalne samouprave („Službene novine Federacije BiH“, broj: 49/06), djeluje kao zakonski zastupnik svojih članica pred vlastima u Federaciji BiH,

sporazumjeli su se o sljedećem:

Član 1.

Predmet Sporazuma je međusobna saradnja Potpisnika na unapređenju sistema lokalne samouprave.

Član 2.

Ciljevi saradnje iz člana 1. Sporazuma su:

- Implementacija zajedničke koordinacije i efikasnog institucionalnog dijaloga u implementaciji aktivnosti za unapređenje sistema lokalne samouprave;
- Implementacija procesa decentralizacije u skladu sa Zakonom o principima lokalne samouprave u FBiH;
- Potpuna implementacija principa supsidijarnosti putem osiguravanja prava građana za direktno učešće u javnim poslovima na lokalnom nivou;
- Osiguranje odgovornog i jedinstvenog vršenja javnih poslova svih nivoa vlasti u lokalnoj zajednici.

Član 3.

Aktivnosti za ostvarivanje saradnje iz člana 1. Sporazuma podrazumijevaju izradu i donošenje Kodeksa o odnosima između nivoa vlasti u Federaciji Bosne i Hercegovine (u daljem tekstu: "Kodeks"), kojim će se u cilju sistemskog uređenja ovih odnosa u skladu sa Ustavom Federacije BiH, principima Evropske povelje o lokalnoj samoupravi i Zakona o principima lokalne samouprave, pored općih principa o saradnji, posebno urediti sljedeće oblasti:

- Saradnja u oblasti zakonodavstva, a posebno implementacije Zakona o principima lokalne samouprave;
- Aktivnosti na planu fiskalne decentralizacije;
- Aktivnosti po pitanju imovine jedinica lokalne samouprave i korištenja prirodnih resursa;
- Usvajanje Strategije obuke za jedinice lokalne samouprave u Federaciji BiH;
- Aktivnosti na planiranju lokalnog razvoja i integracije sa strateškim planiranjem viših nivoa vlasti;
- Mehanizmi za realizaciju Kodeksa.

Član 4.

U cilju realizacije aktivnosti iz člana 3. Sporazuma, Potpisnici formiraju Radnu grupu za izradu Kodeksa u koju će imenovati svoje predstavnike.

Član 5.

Za realizaciju ovog sporazuma, u ime Vlade Federacije BiH odgovoran je ministar pravde, a u ime Saveza općina i gradova Federacije BiH, predsjednik Predsjedništva Skupštine Saveza.

Član 6.

Svi međusobni odnosi između Potpisnika Sporazuma, u postupku realizacije Sporazuma, regulisat će se posebnim aktima njihovih nadležnih organa.

Član 7.

Sporazum stupa na snagu danom njegovog potpisivanja od strane ovlaštenih lica Potpisnika.

Član 8.

Izmjene i dopune Sporazuma, vrše se na osnovu međusobnog dogovora, na način i po postupku za njegovo zaključivanje.

Član 9.

Sporazum je sačinjen u 6 (šest) istovjetnih primjeraka, od kojih Potpisnici zadržavaju po 3 (tri) primjerka.

**VLADA FEDERACIJE
BOSNE I HERCEGOVINE
Premijer**

**SAVEZ OPĆINA I GRADOVA
FEDERACIJE BOSNE I HERCEGOVINE
Predsjednik Predsjedništva Skupštine**

Nermin Nikšić, s.r.

Vlado Alilović, s.r.

Broj:
Neum, 06.10.2011. godine

Broj:
Neum, 06.10.2011. godine